

«Motivaziun per far enzatgei niev»

Dumengia proxima elegia il suveran da Breil ses gremis politics per il proxim trienni

DA HANS HUONDER / ANR

■ **Suenter la demissiu da Richard Caduff elegia la vischnaunca da Breil dumengia proxima in niev president communal. A disposiziun per quei uffeci stat il vicepresidente Clau Schlosser. En elecziun vegnan era ils ulteriurs commembers da suprastanza, la cummissiun da quen e gestiun, il cussegl da vischnaunca ed il cussegl da scola.** Muort limita dil temps d'uffeci terminescha *Richard Caduff* sia funcziun alla testa dalla vischnaunca da Breil. 12 onns ha el tgamunau quella. Demissiuhan han denton era ils geraus *Daniela Seiler* ed *Eugen Friberg*. Dils vegls stat sulettamein *Pius Monn* a disposiziun per la reelecziun, ferton ch'il vicepresidente *Clau Schlosser* candidescha pil presidi communal. Novs candidats per la suprastanza communal ein *Roman Benedetg Cathomas*, *Selda Cavign-Cathomas* e *Martin Comincioli*.

Da casa a Capaul

Il candidat pigl uffeci da president communal, Clau Schlosser (50), ei buc in nunenconuscent ella politica communal. Nov onns ha el apparteniu al cussegl da vischnaunca avon che far ina pausa e s'engaschar lu sco gerau. Avon sis onns eis el vegnius eligius in quei uffeci e dapi lu diregia el il departament d'agricultura e serenera. Dapi treis onns eis el vicepresidente communal. Clau Schlosser che habitescha cun sia famiglia a Capaul el vischinadi da Dardin ei denton era staus ina perioda d'uffeci suppleant da deputau e duront sis onns cumandant dils pumpiers da Breil. El meina dapi 21 onns in puesser cun animals armentivs e cultivescha rodund 20 hectaras prau da siu menaschi a Cantanaus sut Dardin anora. Entginas nuorsas cumpleteschan



Daventa Clau Schlosser dumengia proxima il niev president communal da Breil? El ei il sulet candidat official per quei post.

FOTO H. HUONDER

il menaschi. 33 onns eis el staus in commember fideivel dalla musica da Dardin, respectivamein Breil-Dardin. Tenor Clau Schlosser ha Dardin giu il davos president communal – Sep Mudest Maisen – ils onns 1960. Igl ei pia rodund 50 onns che quei mandat ei buca pli vegnius surdaus al vischinadi cun rodund 150 habitontas e habitonts.

Ina nova sfida

«La politica ha en sesez adina interessau mei. Jeu sundel denton mai staus fitgias

sin quei uffeci da president communal. Gia avon dus onns sundel jeu vegnius plidentaus da surprender quei mandat suenter la demissiu da Richard Caduff», di Clau Schlosser che spera naturalmein cun in bien resultat dumengia proxima. Suenter madira ponderaziun seigi el lu tonaton sedecidiu da candidar: «Per mei ei quei ina nova sfida. Igl ei enzatgei niev e la motivazin persuenter ei avon maun.» Clau Schlosser ei pertscharts ch'igl avegnir vegn probamein ad esser onz pli dirs ch'ils davos

onns: «La vischnaunca da Breil ha investau fetg e bein ils davos onns. Tenor miu manegiar ha ei num ussa da consolidar il contonschiu, mo tonaton da mantener quei ch'ei realisau.» In'otra finamira fetg essenziala dil candidat pil presidi communal ei la populaziun: «Schegie ch'igl ei buca sempel, less jeu secapescha empruar da mantener il diember da habitontas e habitonts che nus havein. Ina reducziun havess lu bein spert era in effect negativ per exempel sin la scola. Ils davos onns havein nus

giu in diember d'intrasgliauter diesch naschientschas per onn e quei ei bien.» In'egliada speciala vul Clau Schlosser denton era dar al turissem: «Vid el penda fetg bia. Sch'ei va mal cun la fatschenta turistica piteschan fetg biars.» Las investiziuns fatgas ils davos onns el turissem seigien denton empermettentas. Aviatrs eis el era per ina eventuala fusiun cun las vischnauncas da Vuorz ed Andiastr: «Quei fuss segiramein ina buna caussa, mo igl'empre pass ston las duas vischnauncas pintgas far. En quella discussiun lein nus buca semischedar.»

Tensiun mo a Breil-Vitg

Ultra dalla suprastanza communal elegia Breil dumengia proxima era la cummissiun da quen e gestiun. Per quella candideschan *Sonja Tenner-Alig*, *Ludovic Desax* e *Daniel Carigiet*. Pil cussegl da vischnaunca stattan a disposiziun pil vischinadi da Breil-Vitg *René Carigiet jun.*, *Guido Caduff*, *Veronica Cathomen-Casanova*, *Urs Cathomas*, *Roland Deplazes*, *Mario Seiler* e *Maurus Tomaschett*; per il vischinadi da Dardin *Aluis Cabannes* e *Pascal Derungs*; per il vischinadi da Danis-Tavanasa *Marcus Brunner*, *Corsin Albin*, *Priska Sgier-Caduff*, *Cassian Friberg* e *Martin Riedi*. Pil cussegl da scola candideschan *Daniel Herger*, *Carmelia Gort*, *Silvia Schmed-Capaul* ed *Alexia Tuor-Derungs*. En elecziun vegnan era suppleantas e suppleants per la cummissiun da quen e gestiun, per il cussegl da vischnaunca ed il cussegl da scola. In cumbat d'elecziun dat ei sulettamein per ils sis sez da Breil-Vitg el cussegl da vischnaunca. Cheu dat ei siat candidats per sis posts. In eventual secund scrutini ha liug ils 14 da zercladur 2015.

Cun Ivo Frei sco niev president

Uniun da fautors dil MRS a Glion

■ **(anr/gc) Avon in onn ei Markus Casanova seretrats sco parsura dall'Uniun da fautors dil Museum Regional Surselva (MRS) a Glion. Ins veva anflau negin successur per el ed era per igl ulterior suprastont demissiuont Remo Arpagaus. La suprastanza reducida secumponeva mo pli dall'actuara e dalla cassiera.** Vitier ei lu aunc vegniu che l'actuara, *Barbara Meier*, ei seretrata tut surura. Restada fuva pia mo la premura da cassiera *Marianne Röthlisberger*.

La suprastanza ei puspei completa

Ins ei semess immediat alla tscherca da suprastonts – giu cletg – ed aschia saviu presentar alla radunonza dall'uniun da commembers da mardis vargau a Glion candidats per in team complet.

Per il proxim trienni secumpone la suprastanza sco suonda: *Ivo Frei*, president, Glion; *Marlis Derungs*, actuara, Glion;

Marianne Röthlisberger, cassiera reeligida, Flem; *Remo Camenisch*, Glion, ed *Arnold Wieland*, Glion, sco assessurs. Sco niev revisur da quen ei *Jakob Cabernard*, Glion, vegnius tscharnius. Ins ei staus leds e cuntents da haver saviu occupar tut ils posts vacants en suprastanza. Beneventau, introduciu e tgamunau la radunonza ha gia il president in spe Ivo Frei.

Acziuns e quen per 2014

Malgrad ch'ins veva strusch tgamun ein las acziuns tradiziunalas – per procurar entradas – vegnidas realisadas era igl onn vargau: La Fiasta dil marcau (Städtifest) ha purtau la biala summa da 7000 francs. La Fiera d'advent ed il Marcau da praulas ein stai frequentai fetg bein ed han alzau il conto dall'uniun per 1300 francs. Quels imports – cun las contribuziuns dils commembers da sur 22000 francs – han possibilitau da surdar al MRS la biala summa

da 33500 francs. Quei ei ton sco tut las entradas. La facultad munta aunc a 1500 francs ed ei perquei s'augmentada mo per 143 francs.

Deplorabilein tschessa il diember da commembers. Igl onn vargau han ins stuiu registrar 20 extradas e mo duas entradas. Dapresent ha l'uniun 420 commembers. Il giavisch fuss da puspei vegnir sin pli che 500.

Activitads per 2015

Las occurrenz usitadas: Fiasta dil marcau (uost), Fiera d'advent (november) e Marcau da praulas (december) han puspei liug. En vesta han ins plinavon priu da far in concert da beneficenza (sco pli baul) cun produziuns musicalas en il Cinema Sil Plaz. Realisabel ei quei probabel per 2016. A sestentar vegnan ins vinavon per recaltgar novs commembers. Las contribuziuns restan sco tochen ussa: singuls commembers 50 francs, students ed emprendists 20 francs, famiglias 75 francs e firmas 100 francs.

La conservatura dil MRS, *Marianne Fischbacher*, annunzia per questa stad in'exposiziun speciala sur da Glion en connex cun l'ediziun dil niev cudisch dall'istoria da quel. En vesta tegnan ins era che la vischnaunca fusiunada da Ilanz/Glion cumpeggia ussa 13 fracziuns.

Claudia Pfister, Sagogn, geografa, ei la nova menadra dil MRS. Ella prevesa d'organisar era luvratris per affons ed excursiuns culturalas en divers vitgs dalla Surselva. Bien grau per l'activitad dall'uniun da fautors sa era il niev president dil Cussegl da fundaziun MRS, *Leo Cathomas*. La contribuziun da quella uniun seigi indispensabla ed existenziala per il MRS.



Curdin Tuor, il manader dal Center da furmazion Surselva.

RTR, C. ALBIN

Scola media mercantila sin chommas falombras

■ **(cp) Il Center da furmaziun Surselva a Glion ha problems cun il dumber da novas scolaras e novs scolaras. Per la Scola media mercantila è s'interessada mo ina persuna.** Dapi plirs onns ha il Center da furmaziun Surselva a Glion adina puspè da cumbatter cun il dumber da scolaras e scolaras. Il center che porscha scolaras medias, scolaras commercialas e scolaras industrialas senta la depopulaziun da las Vals sursilvanas. Cunzunt la Scola media mercantila ha ils davos onns adina gi pli e pli paucs interessents. Per il nov onn da scola 2015/16 è s'annunziada enfin uss mo ina persuna. Tenor il manader dal Center da furmaziun Surselva, *Curdin Tuor*, è cunzunt la concorrenza entras la Scola commerciala gronda.

Cuntanscher la maturitad professiunala en la Scola media mercantila cuzza quatter onns (trais onns scola ed in onn praticum). En la scola professiunala profil M cuzza quai mo traus onns. Ord quest motiv blers che sa decidan per la scola professiunala.

Scola media specialisada ha success

Avant in onn ha il center da furmaziun perquai vuli midar la Scola media mercantila en ina Scola media specialisada d'informatica. Scolas medias specialisadas han dapli success e l'interess era dà. Il cussegl grond n'ha dentant betg lubi questa midada. Uschia ha Curdin Tuor planisà da porscher la Scola media mercantila cun informatica sco rom lateral. La decisiun da far quai è dentant crudada memia tard per anc attrair avunda scolaras e scolaras. Per l'onn da scola 2016/17 èn gia s'annunziadas sis persunas.

Restar averts per alternativs

Tenor Curdin Tuor sto il Center da furmaziun Surselva restar flexibel e sviluppar novas purschidas. Era na dastgia el betg mantegnair per tut pretsch purschidas da scolaziun che sajan antiquadas. Mo uschia saja pussaivel da mantegnair la scola a Glion. Il problem da la depopulaziun da las Vals sursilvanas na vegnia betg pli pitschen en il futur.



Ivo Frei – il niev parsura dall'Uniun dils fautors dil MRS.

MAD